



Cumün da vaschins Zernez

Protocol

Radunanza da vaschins da mardi, als 29 da november 2016, a las 20.00, i'l center cumünal a Zernez

Preschaints: 15 vaschinas e vaschins cun dret da vuschar

S-chüsats: Christa Pinggera, Jack Pinggera, Seraina Bickel, Martina Peretti-Müller, Fabian Schorta ed Arno Felix

Tractandas:

- 1. Salüd e bivgnaint**
- 2. Tscherna da duos scrutinaduors**
- 3. Protocol da l'ultima radunanza da vaschins dals 30 da marz 2016**
- 4. Dret da passagi tras la parcella nr. 2228 in Davo Plattas a Susch per üna lingia da chanelisaziun per la chasa da la fam H. Rudigier pro la Crusch Salet, Susch**
- 5. Dumonda da fam. Jon Andrea Könz cun Luca, Anna Lena e Joannes, tuots a Zernez chi sun vaschins da Scuol per dvantar vaschins da Zernez**
- 6. Dumonda da Sar Curdin Frei, sia mamma duonna Iris Frei-Andrist e la sour da quella, duonna Erica Heidrich-Andrist, tuots vaschins Svizzers chi abitan sül Flüela Hospiz a Susch, per dvantar vaschins da Zernez**
- 7. Tscherna da substituziun illa cumischiun sindicatoria davu la demischiun da sar Walter Mischol**
- 8. Orientaziuns e Varia**

1. Salüd

Il president salüda la radunanza e giavüscha la buna saira. El constatescha cha la bannida es ida oura a temp e cha la radunanza es abla da decider. El preschainta la glista da tractandas e lascha approvar quella da la radunanza.

2. Tscherna da duos scrutinaduors

I basta cun ün scrutinadur. Sco scrutinadur vegn tschernü Leo Platzer.

3. Protocol da la radunanza dals 30 marz 2016

Il protocol es stat expost illas assas nairas e sülla pagina d'internet dal cumün. El vain approvà sainza cuntravusch.

4. Dret da passagi tras la parcella nr. 2228 in Davo Plattas a Susch per üna lingia da chanelisaziun per la chasa da la fam H. Rudigier pro la Crusch Salet, Susch

La suprastanza ha preschantà il proget da la famiglia Rudigier. Cun quai chi vain fat ün s-chav da la Crusch Salet oura vers Susch per la rait electrica d'ota tensiun da las OEE/EKW, vain quel trat a nüz per metter giò eir üna lingia da chanelisaziun per la

chasa in Crusch Salet chi intant ha be ün tanc da chanelisaziun chi ha da gnir svödà da temp in temp. Davent da la via chi maina sün Plattas fin pro las chasas da Davo Plattas sto gnir prolungà il s-chav aposta per la chanelisaziun. La parcella da la via da Plattas es la parcella 2228 dal cumün da vaschins chi vain traversada per ün per meters. L'acconsentimaint per far quai dà la radunanza cun unanimità da vuschs.

5. Dumonda da fam. Jon Andrea Könz cun Luca, Anna Lena e Joannes, tuots a Zernez chi sun vaschins da Scuol per dvantar vaschins da Zernez

Sar Jon Andrea Könz chi abita daspö sia naschentscha a Zernez e seis uffants Luca, Anna Lena e Joannes, tuots fingià majorens chi abitan eir daspö lur naschentscha a Zernez sun gnüts tras la fusiun da cumüns vaschins da Scuol. Els sun dimena fingià vaschins Grischuns e Svizzers. Oramai ch'els han üna relaziun stretta cun Zernez, han els fat la dumonda per dvantar tuots vaschins da Zernez.

La suprastanza propuona a man da la radunanza da conceder quist dret da vaschinadi. La radunanza segua a quella proposta pro mincha singul d'els cul seguaint esit:

Jon Andrea Könz, 15 vuschs da schi

Luca Könz, 15 vuschs da schi

Anna Lena Könz, 15 vuschs da schi

Joanas Könz, 15 vuschs da schi

6. Dumonda da Sar Curdin Frei, sia mamma duonna Iris Frei-Andrist e la sour da quella, duonna Erica Heidrich-Andrist, tuots vaschins Svizzers chi abitan sül Flüela Hospiz a Susch, per dvantar vaschins da Zernez

Sar Curdin Frei maina daspö ün pêr ons in quarta generaziun l'Hotel Flüela Hospiz süssom il Pass dal Flüela a Susch. Causa cha la relaziun da sia famiglia cun quel lö süssom il pass, ma eir cula vart engiadinaisa dal pass es vaira stretta, ha el uossa fat la dumonda da pudair dvantar vaschin da Zernez. Listessamaing eir sia mamma Iris Frei Andrist e duonna Erica Heidrich-Andrist, las sours schemblinas chi han manà in terza generaziun l'affar da famiglia. Cun quai ch'els sun vaschins da lös ils chantuns Turich e Berna, sun els vaschins svizzers, ma na grischuns e survegnan cul dret da vaschinadi da Zernez eir quel dal chantun Grischun.

La suprastanza propuona eir pro quistas persunas d'acconsentir a la dumonda dal dret da vaschinadi. L'esit da la votaziun per mincha singula dumonda es il seguaint:

Curdin Simon Frei, 15 vuschs da schi

Iris Frei-Andrist, 15 vuschs da schi

Erica Heidrich-Andrist, 15 vuschs da schi

7. Tscherna da substituziun illa cumischiun sindicatoria davo la demischiun da sar Walter Mischol

Propostas: Fabian Schorta

Tscherna fatta per scrutin:	cedlas entrats	15
	cedlas vödas	1
	vuschs valablas	14
	majorità absoluta	8 vuschs
Tschernü Fabian Schorta cun		<u>14 vuschs</u>

8. Orientaziuns e varia

- Il president, Rico Zala, orientescha chi sun gnüdas natüralisadas daspö l'ultima radunanza trais persunas tras il proceder automatic da la procedura da natüralisaziun per conjugals ed uffants esters da citadins svizzers. I sun duos duonnas ed ün hom, chi d'eiran vaschins da differents pajais dal muond.
- Las chamonnas süll'ova Spin e Laschadura chi appartgnaiva a la famiglia Langen sun intant acquistadas dal cumün. Davo cha'ls fittadins da fin qua, han pudü far

adöver da quellas fin la fin da november da quist on, gnaran quellas dattas a fit a partir da l'on chi vain, tenor modalitats dal cumün da Zernez.

- Ütilisaziun da posses dals vaschins in Buffalora: In üna cunvegna chi'd es gnüda stipulada cul cumün politic e quel da vaschins da Zernez cun quel da Val Müstair, sun eir in avegnir l'adöver da las vias champestras, il sfrüamaint dal god e l'alpagiada fatschendas chi vegnan regladas exclusivamaing dal cumün da Zernez.
- La parzella da la deponia da l'ova Spin vain dovrada eir quist inviern sco plazzal d'aspet per autos chi vöglan ir a Livigno. Id es ün contrat cullas OEE chi vain fat dad on ad on darcheu da nouv.
- La masüraziun ufficiala svizra es darcheu gnüda modernisada, quai chi ha per consequenza pitschnas correcturas da las masüras da parcelas grondas sco quellas dal cumün da vaschins. (per exaimpel: Parcella da l'Alp Buffalora – differenza da masüra da 49 m implü e quai sainza müdamaints da terms!)
- Pel mumaint es in trais-cha la revisiun totala da la ledscha chantunala da dret da vaschinadi. La suprastanza ha tut posiziun invers la Regenza grischuna i'l rom da la procedura da consultaziun per quista revisiun.
- Pro'l tunnel da la Viafier Retica da Saslatsch a Susch, es gnü fat d'ürant la fabrica da renovaziun dal tunnel ün repar da terra per chi nu giaja gio crappa dal Grip Saslatsch sün la via chantunala. Quel repar vess gnü da gnir allontanà davo il temp da fabrica. Davo avair fat üna visita oculara cul patrun da fabrica ed il cumün politic s'ha decis da laschar quel repar, oramai ch'el dà protecziun ed i gnanca nu's vezza quel.
- Leo Platzer dumonda cha la suprastanza orientescha sur da tuot las duomondas da dret da vaschinadi chi aintran pro'l cumün da vaschins, eir quellas chi nu vegnan preschantadas a la radunanza. Il president da vaschins orientescha cha otras dumondas sco quellas preschantadas hoz nu sajan entradas ingünas daspö la fusiun.

La radunanza po gnir serrada a las 20.50.

Il president:

L'actuar:

Rico Zala

Hermann Thom